

Sentimen Pelabur Malaysia Lemah Dalam Suku Ke-2 2011 - Tinjauan Bernama
16 Ogos, 2011

KUALA LUMPUR, 16 Ogos (Bernama) -- Meskipun sentimen pelabur Malaysia lemah dalam suku kedua tahun ini (2011) berbanding suku yang sama pada 2010 namun ia masih meyakinkan, demikian menurut tinjauan sentimen 'ING Investor Dashboard'.

Dalam satu kenyataan Selasa, ING Funds Bhd, berkata tinjauan itu menunjukkan ketidakpastian global dan inflasi yang semakin meningkat mendorong pelabur memilih pelaburan selamat dan terurus risikonya.

Ia berkata Indeks Sentimen ING Investor Dashboard Malaysia susut kepada 133 mata dalam tempoh April-Jun 2011 daripada 141 mata dalam tempoh yang sama pada 2010.

"Ini mungkin disebabkan oleh kesan inflasi yang semakin meningkat dan masalah pasaran global seperti krisis hutang Eropah yang berlarutan dan keadaan ekonomi AS yang tidak menentu," katanya.

Kata ING, menurut tinjauan itu, 50 peratus pelabur Malaysia berkata situasi ekonomi tempatan akan bertambah baik dalam tiga bulan akan datang manakala 28 peratus berkata ia tidak akan berubah dan 22 peratus berkata ia akan menjadi bertambah buruk.

Katanya emas merupakan pelaburan yang paling digemari dalam tiga bulan akan datang memandangkan sifat dan statusnya sebagai pelaburan selamat.

"Amanah saham juga digemari oleh 46 peratus pelabur kerana ia dianggap lebih terjamin dan lebih cair daripada ekuiti, di samping mempelbagaikan aset sebagai suatu cara menguruskan risiko," katanya.

Bagi tahun 2012, 91 peratus daripada pelabur berkata inflasi mungkin terus pesat tahun depan, katanya.

-- BERNAMA

2011 Hakcipta BERNAMA

Source: <http://www.bernama.com/bernama/v5/bm/newsbusiness.php?id=608533>